

***TAWAF WADA' (FAREWELL CIRCUMAMBULATION) AND
TAWAF SUNAT (VOLUNTARY CIRCUMAMBULATION)
IN THE MATAF (KAABA COURTYARD) FOR HAJJ AND
UMRAH PILGRIMS WHO DECEPTIVELY WEAR IHRAM:
ACCORDING TO THE LEGAL JUSTIFICATION OF
THE SAUDI ARABIAN GOVERNMENT LAW AND THE
PERSPECTIVE OF FIQH (ISLAMIC JURISPRUDENCE)***

***TAWAF WADA' DAN TAWAF SUNAT DI DATARAN KAABAH:
HUKUM JEMAAH HAJI DAN UMRAH MENIPU MEMAKAI
IHRAM DARI JUSTIFIKASI UNDANG-UNDANG
KERAJAAN ARAB SAUDI DAN PERSPEKTIF FIQH***

LUKMANUL HAKIM HANAFI*

Fakulti Syariah dan Undang-Undang, Universiti Sains Islam Malaysia.
lukmanul@usim.edu.my

*Corresponding author: lukmanul@usim.edu.my

A PEER-REVIEWED ARTICLE

(RECEIVED – 23/6/2025; ACCEPTED – 2/10/2025; PUBLISHED – 10/12/2025)

DOI: <https://doi.org/10.65404/JAWHAR.302003>

ABSTRACT

This article aims to describe and explain the position and ruling of *Tawaf Wada'* (Farewell Circumambulation) and *Tawaf Sunat* (Voluntary Circumambulation) in the *Mataf* (Kaaba Courtyard) for Hajj and Umrah pilgrims who deceptively wear *Ihram* attire during this Endemic Season, following the conclusion of the COVID-19 Pandemic Season, from the legal justification of the Saudi Arabian Government Law and the Perspective of *Fiqh* (Islamic Jurisprudence), the Quran, and the *hadith* of Rasulullah (Prophet Muhammad, peace be upon him). To achieve the objective of this paper, the library method or document analysis is used to analyze all relevant collected documents. The findings of this paper indicate that the ruling on performing *Tawaf Wada'* and *Tawaf Sunat*

in the *Mataf* for Hajj and Umrah pilgrims who deceptively wear *Ihram* during this time is Haram (forbidden), sinful, falls under *Mazmumah* (blameworthy) character and manners, and is feared to disrupt the *Mabrur* (accepted) status of the Hajj and Umrah, based on *Fiqh*, the Quran, the *hadith* of Rasulullah (peace be upon him), and *Maqasid Syariah* (Objectives of Sharia). Meanwhile, the justification and decision *Sunat*, dataran made by the Saudi Arabian Government's Law, which allows *Tawaf* in the *Mataf* only for Hajj Pilgrims during the Hajj Season and Umrah Pilgrims for those performing the Umrah ritual only, is accurate and consistent with the Quran and *as-Sunnah*, *Fiqh*, and *Maqasid Syariah*. This is to prevent *Masyaqqah* (hardship), *Zahmah* (crowding), congestion, and harm, as well as the spread of COVID-19 and influenza diseases, which carries its own wisdom. It is hoped that the results of this writing will serve as a guide and reference for future Hajj and Umrah pilgrims to follow and obey the *Tawaf Wada'* and *Tawaf Sunat* regulations set by the *Ulil' Amri* (those in authority), the Government of the Kingdom of Saudi Arabia, and to be certain of its wisdom in performing Hajj and Umrah based on *Akhlak Mahmudah* (praiseworthy character), subsequently achieving *Hajj* and *Umrah Mabrur*.

Keywords: *Tawaf Wada'* (Farewell Circumambulation), *Tawaf Sunat* (Voluntary Circumambulation), *Mataf* (Kaaba Courtyard), Endemic COVID-19, Saudi Arabian Government Law, *Fiqh* (Islamic Jurisprudence)

ABSTRAK

Artikel ini bertujuan menerangkan dan menjelaskan bagaimana kedudukan dan hukum *Tawaf Wada'* serta *Tawaf Sunat* di dataran Kaabah bagi jemaah haji dan umrah yang menipu memakai ihram ketika ini di musim endemik selepas berakhirnya musim pandemik COVID-19 dari justifikasi undang-undang kerajaan Arab Saudi dan perspektif *Fiqh*, al-Quran, dan *hadith* Rasulullah SAW. Bagi mencapai objektif penulisan ini, kaedah keperpustakaan atau analisa dokumen digunakan untuk menganalisis semua dokumen berkaitan yang dikumpul. Dapatan kertas kerja ini mendapati hukum menunaikan *Tawaf Wada'* dan *Tawaf Sunat* di dataran Kaabah bagi jemaah haji dan umrah yang menipu memakai ihram ketika ini adalah haram, berdosa serta termasuk dalam adab dan akhlak *Mazmumah* dan dibimbangi akan mengganggu kemabruran haji dan umrah berdasarkan *Fiqh*, al-Quran, *hadith* Rasulullah SAW dan *Maqasid Syariah*. Manakala justifikasi dan keputusan yang diputuskan oleh Undang-undang kerajaan Arab Saudi yang membenarkan

Tawaf di dataran Kaabah hanya untuk jemaah haji pada musim haji sahaja dan jemaah umrah bagi yang menunaikan Ibadat umrah sahaja adalah tepat dan selari dengan al-Quran dan as-Sunnah, Fiqh dan Maqasid Syariah bagi mengelakkan Masyaqqah, bersesak-sesak dan kemudaratannya serta penularan penyakit COVID-19 dan influenza yang mana mempunyai hikmahnya yang tersendiri. Diharapkan, hasil penulisan ini akan menjadi panduan dan rujukan kepada bakal-bakal jemaah haji dan umrah yang akan datang agar dapat mengikuti dan mentaati undang-undang *Tawaf Wada'* dan *Tawaf Sunat* yang ditetapkan oleh Ulil' Amri iaitu pemerintah kerajaan Arab Saudi dan meyakini hikmahnya dalam melaksanakan Ibadat haji dan umrah berdasarkan akhlak mahmudah seterusnya memperoleh haji dan umrah yang mabrur.

Kata Kunci: *Tawaf Wada'*, *Tawaf Sunat*, Dataran Kaabah, Endemik COVID-19, Undang-undang kerajaan Arab Saudi, Hukum Fiqh

1. PENDAHULUAN

Larangan *Tawaf Wada'* dan *Tawaf Sunat* di dataran Kaabah ini bermula tatkala tindakan kerajaan Arab Saudi mengumumkan tidak membenarkan jemaah haji dunia yang tinggal di luar negaranya menunaikan ibadat haji pada musim haji 2020 yang lalu di Tanah Suci Mekah melainkan hanya membenarkan 10,000 jemaah haji yang tinggal di dalam negara Arab Saudi sahaja yang boleh menunaikan Ibadat haji pada tahun tersebut. Kemuncak rasa kekecewaan jemaah haji dunia ini sekali lagi terpancar apabila kerajaan Arab Saudi sekali lagi mengumumkan buat tahun kedua berturut-turut bahawa jemaah haji dunia yang tinggal di luar negaranya sekali lagi tidak dibenarkan menunaikan ibadat haji pada musim haji 2021 di Tanah Suci Mekah melainkan kerajaan Arab Saudi hanya membenarkan 60,000 jemaah haji yang tinggal di dalam negara Arab Saudi sahaja yang boleh menunaikan Ibadat haji pada tahun tersebut. Ini bermakna pada kedua-dua tahun iaitu tahun 2020 dan tahun 2021 tiada ibadat umrah dibenarkan sama ada jemaah di dalam negara Arab Saudi mahu pun jemaah dari seluruh dunia.

Namun begitu, pada musim haji 2022, kerajaan Arab Saudi telah membuka kembali pintu sempadannya, apabila membenarkan jemaah haji dunia menunaikan ibadat haji buat kali pertama selepas hampir dua tahun tiada ibadat haji bagi jemaah dunia yang tinggal di luar negara Arab Saudi. Namun begitu, kuota yang dibenarkan bagi setiap negara adalah kecil iaitu separuh sahaja daripada kuota

0.1% yang dibenarkan oleh OIC. Ini sebagai langkah berjaga-jaga kerajaan Arab Saudi dalam mengawal kehadiran jemaah dunia yang ramai di samping bimbang jangkitan penyakit COVID-19 kembali menular. Bagi negara Malaysia, kuota yang diperolehi pada ketika itu adalah 16, 400 orang termasuk kuota tambahan. Jumlah kehadiran jemaah dunia menunaikan ibadat haji pada tahun 2022 adalah lebih kurang 876,000 tidak lebih 1 juta jemaah.

Manakala pada musim haji tahun 2023 dan 2024, kerajaan Arab Saudi telah kembali membuka pintu sempadannya secara besar-besaran di atas keyakinan berjaya mengawal wabak COVID-19 ketika musim haji 2022. Ini dapat disaksikan apabila semua negara dikurniakan kuota penuh 0.1% dari jumlah penduduk negara tersebut berdasarkan undang-undang OIC yang mana negara Malaysia sebagai contoh dikurniakan kembali kuota penuh 31,600 orang.

Walaupun kerajaan Arab Saudi telah kembali membuka pintu sempadannya kepada jemaah dunia untuk menunaikan ibadat haji dan umrah, namun beberapa undang-undang baru ketika melaksanakan ibadat haji dan umrah telah diperkenalkan. Ini adalah bertujuan untuk mengekang jangkitan penyakit COVID-19 kembali menular dalam kalangan jemaah haji dan umrah. Di antaranya jemaah haji dan umrah hanya dibenarkan beribadat di dataran Kaabah ketika menunaikan ibadat rukun dan wajib haji dan umrah sahaja. Manakala bagi jemaah yang tidak melakukan ibadat haji dan umrah tetapi ingin beribadat di Masjidil Haram, maka pihak berkuasa Arab Saudi hanya membenarkan beribadat di dalam Masjidil Haram sahaja termasuk di tingkat 1, 2 dan 3 kecuali dataran Kaabah.

2. PERMASALAHAN

Permasalahan dan kesan negatif daripada perlakuan ibadat jemaah dunia di dataran Kaabah bermula pada pertengahan musim umrah pada tahun 2022, seterusnya menular pada seluruh musim umrah 2023 dan sehingga kini. Selepas berjaya mengawal dan menganjurkan kembali ibadat haji dengan kuota penuh kepada seluruh jemaah haji dunia mengerjakan Ibadat haji pada musim haji 2022 hingga berakhirnya musim haji pada tahun tersebut iaitu pada bulan Julai 2022. Maka kerajaan Arab Saudi mula berani membuka pintu sempadannya kepada jemaah dunia untuk melakukan ibadat umrah pula. Ini kerana dunia ibadat umrah telah ditutup dan menyepi daripada pelaksanaannya hampir dua

tahun lebih iaitu semenjak diserang pandemik COVID-19 pada Februari 2020 sehingga Julai 2022.

Pada bulan Ogos tahun 2022, iaitu selepas pulang semua jemaah haji dunia dan berakhir musim haji 2022. Lahirlah khabar gembira bagi seluruh seluruh umat Islam, apabila kerajaan Arab Saudi telah mengotakan janjinya dengan kembali membuka secara rasmi pintu sempadan negaranya bagi menyambut Umat Islam yang ingin melakukan ibadat umrah.

Namun begitu, ia perlu dibayar dengan harga yang mahal apabila syarat baru mula diperkenalkan. Syarat baru dan permasalahan ini mula timbul akibat daripada langkah berani keputusan kerajaan Arab Saudi yang mengumumkan dan memutuskan mulai bulan Ogos musim umrah 2022, hanya jemaah yang memakai Ihram untuk menunaikan ibadat umrah sahaja dibenarkan masuk ke dataran Kaabah sama ada untuk bertawaf umrah, solat sunat tawaf, solat-solat sunat atau solat fardhu apabila waktu telah masuk dan azan berkumandang, berzikir, melihat Kaabah, berdoa dan lain-lain yang berkaitan ibadat umrah. Manakala ibadat lain selain daripada menunaikan ibadat umrah seperti *Tawaf Sunat*, *Tawaf Wada'*, Tawaf Tahiyatul Ba'it atau Tawaf menghormati Kaabah, solat fardhu, beriktikaf dan lain-lain tanpa ihram umrah maka adalah dilarang.

Pada peringkat awal pelaksanaan undang-undang ini iaitu di awal musim umrah 2022 sekitar bulan Ogos, September, Oktober dan November, ia berjalan sangat lancar kerana jemaah umrah dunia mematuhi arahan dan undang-undang tersebut. Ini dapat dilihat, kesan daripada pelaksanaan undang-undang baru ini, apabila dataran Kaabah dilihat sangat luas dan tidak berlaku kesesakan atau jemaah yang bertawaf tidak ramai seperti mana pada zaman sebelum COVID-19 dahulu. Jemaah umrah dunia yang kelihatan di dataran Kaabah hanya jemaah yang memakai Ihram dengan melakukan ibadat umrah seperti bertawaf, solat sunat tawaf, berzikir dan berdoa serta minum air zam-zam. Manakala jemaah umrah dunia yang tidak melakukan ibadat umrah dan tidak memakai Ihram kelihatan hanya di dalam Masjidil Haram dengan menunaikan solat fardhu 5 waktu, solat sunat, membaca al-Quran, beriktikaf, berzikir, berdoa, mendengar kuliah-kuliah Syekh Masjidil Haram, *Tawaf Sunat*, *Tawaf Wada'*, Tawaf Tahiyatul Ba'it atau Tawaf menghormati Kaabah, minum air zam-zam, bersedekah dan lain-lain lagi.

Alhamdulillah, perkara ini disaksikan sendiri oleh penulis sebagai pengkaji. Selepas bertugas haji dan menjalankan penyelidikan haji di musim pandemik COVID-19 daripada geran yang diterima iaitu pada musim tahun 2022, 2023 dan 2024. Selepas pulang daripada bertugas haji pada pertengahan bulan Ogos 2022. Maka pada awal bulan September 2022 di awal musim umrah 2022 yang baru dibuka kembali, penulis direzekikan oleh Allah SWT datang kembali ke Tanah Suci Mekah untuk kembali menyambung kajian tetapi kali ini dalam kajian ibadat umrah di musim pandemik COVID-19.

Ketika penulis menjalankan kajian di musim umrah yang baru bermula buat kali pertama selepas habis musim haji Julai 2022, didapati semua jemaah dunia mematuhi undang-undang yang ditetapkan. Kesannya, dataran Kaabah menjadi sangat lapang kerana jemaah yang ada di dataran Kaabah hanyalah mereka yang melakukan Ibadat umrah iaitu Tawaf Ifadah atau Tawaf Umrah, solat sunat tawaf selepas selesai Tawaf Umrah, berdoa, melihat Kaabah, berzikir dan juga bersujud syukur di depan Kaabah dan kemudian beredar ke tempat Saie. Maka sebab itu, objektif yang ditetapkan oleh kerajaan Arab Saudi bagi mengelakkan kesesakan dan penularan penyakit COVID-19 ketika melaksanakan ibadat umrah tercapai.

Namun begitu, kepatuhan ini tidak berpanjangan, hasil daripada data serta maklumat dan tinjauan sendiri yang dilakukan oleh penulis dan pengkaji yang mana penulis direzekikan lagi pergi enam kali ke Tanah Suci Mekah pada awal Disember 2022, awal Mac 2023, musim haji 2023 dari bulan Jun sehingga bulan Ogos 2023 dan kemudian awal November 2023 sehingga umrah Mac 2024 dan musim haji 2024 dari bulan Jun hingga Ogos 2024 yang mana telah masuk musim endemik. Maka penulis dapati, mula timbulnya permasalahan jemaah dunia mula menipu memakai ihram dan menyamar sebagai jemaah umrah menunaikan ibadat umrah di dataran Kaabah.

Ia berlaku di awal bulan Disember 2022 ketika jemaah dunia mula berduyun-duyun datang ke kota Mekah kerana umrah cuti sekolah dan umrah cuti musim sejuk sehingga hari ini. Dapatan mendapati, keadaan telah berubah, apabila dataran Kaabah dilihat seperti tiada penghujungnya apabila jemaah dunia tetap ramai dan sesak. Kesemua mereka memakai ihram tidak kira pada waktu subuh sampailah ke subuh pada keesokan harinya. Ini yang menjadikan keadaan pelik kerana bagaimana jemaah boleh padat di dataran Kaabah sedangkan undang-undang telah diperkenalkan. Di akhirnya, selepas diamati, ditekuni dan dikaji, maka didapati jemaah dunia termasuk jemaah Malaysia telah melakukan penipuan. Permasalahan ini berlaku kerana mereka tidak mahu beribadat di dalam Masjidil Haram, tetapi sebaliknya tetap memilih mahu beribadat di

dataran Kaabah dengan alasan jika *Tawaf Wada'*, *Tawaf Sunat*, solat fardhu atau Ibadat sunat yang lain dilakukan di dataran Kaabah, maka ia lebih dekat dengan Kaabah, jimat waktu iaitu sekitar 20 hingga 30 minit sahaja dan cepat habis Tawaf serta lebih khusyuk, berbanding solat dan Tawaf di dalam Masjidil Haram yang mana ia lebih jauh dari Kaabah dan mengambil masa yang lama iaitu kira-kira 1 jam atau lebih untuk menghabiskan tujuh pusingan Tawaf.

Sehubungan itu, jemaah dunia telah mengambil jalan pendek dan salah dengan membelakangkan undang-undang dan peraturan yang telah ditetapkan oleh Kerajaan Arab Saudi dan pihak berkuasa Masjidil Haram. Mereka telah menyamar dan menipu dengan memakai ihram, seolah-olah mereka seperti mahu menunaikan ibadat umrah. Selepas berjaya memperdayakan polis, tentera atau pihak berkuasa penjaga pintu masuk Masjidil Haram dan telah sampai ke dataran Kaabah, mereka tidak melakukan ibadat umrah, sebaliknya melakukan ibadat lain seperti *Tawaf Sunat*, *Tawaf Wada'*, solat berjemaah, duduk melihat Kaabah sambil berdoa dan berzikir dan lain-lain. Ini ternyata jelas melanggar perintah kerajaan Arab Saudi sebagai Ulil Amri yang disebut dalam al-Quran, dan melanggar hadith Rasulullah SAW yang melarang jemaah haji dan umrah melakukan dosa ketika mengerjakan ibadat di Tanah Suci Mekah di samping melanggar undang-undang yang ditetapkan.

3. PERSPEKTIF FIQH HUKUM JEMAAH MENIPU MEMAKAI IHRAM

Tawaf bermaksud mengelilingi kaabah dengan syarat-syarat sahnya berserta dengan amalan-amalan sunatnya. Tawaf umrah ialah tawaf rukun yang mesti dilakukan oleh orang yang mengerjakan umrah, sekiranya tidak dilakukan, maka tidak sah ibadat umrahnya. *Tawaf Sunat* ialah tawaf yang sunat dilakukan pada bila-bila masa. *Tawaf wada'* pula ialah tawaf selamat tinggal yang wajib dilakukan bagi mereka yang hendak meninggalkan Mekah lebih dari dua *marhalah* iaitu lebih kurang 56 batu atau 81 kilometer dan lebih. Manakala Tawaf *Tahiyat al-Bait* ialah Tawaf yang sunat dilakukan bagi menghormati Kaabah sewaktu memasuki Masjidil Haram.

Seseorang yang melaksanakan ibadat haji dan umrah seharusnya menghindarkan dirinya daripada melakukan dosa dan perkara yang dilarang. Ini adalah kerana dibimbangi akan mengurangkan pahalanya dan mengganggu kemabruran haji dan umrahnya. Hal ini seperti mana permasalahan merokok yang dilakukan oleh

jemaah haji ketika tinggal dan melakukan ibadat haji di Tanah Suci Mekah yang mana disebut dalam Muzakarah haji Peringkat Kebangsaan pada tahun 2009 iaitu ia berdosa dan mengganggu kemabruran haji. Ini kerana merokok itu adalah haram dalam fatwa Malaysia dan dunia. Melakukan sesuatu ibadat yang wajib dan bercampur dengan perbuatan dosa adalah ditegah.

Dalam isu ini, jemaah sepatutnya mentaati undang-undang dan peraturan yang telah ditetapkan oleh pemimpin dan pemerintah kerajaan Arab Saudi iaitu bagi jemaah yang tidak melakukan ibadat umrah atau haji, tetapi ingin melakukan ibadat selain ibadat umrah dan haji seperti *Tawaf Sunat* dan *Tawaf Wada'*, maka hendaklah melaksanakannya di Tingkat 1 atau 2 atau juga di tingkat 3 di dalam Masjidil Haram dan tidak menipu melakukannya di dataran Kaabah.

Manakala kedudukan dan hukum jemaah yang sengaja menipu memakai ihram ketika melakukan *Tawaf Wada'* dan *Tawaf Sunat* di dataran Kaabah dengan sengaja melanggar perintah pemimpin atau pihak berkuasa Arab Saudi adalah berdosa dan dibimbangi akan mengganggu kemabruran Ibadat haji dan umrahnya.

Sultan atau pemerintah merupakan tonggak utama dalam sesebuah negara. Tanpa mereka, keadaan masyarakat di negara tersebut akan menjadi huru-hara kerana tidak ada orang yang bertanggungjawab untuk menguruskannya.

Dalil al-Quran

Terdapat banyak dalil menunjukkan wajib taat kepada pemimpin antaranya adalah firman Allah SWT dalam **Surah an-Nisaa' ayat 59** yang bermaksud:

يَا أَيُّهَا الَّذِينَ آمَنُوا أَطِيعُوا اللَّهَ وَأَطِيعُوا الرَّسُولَ وَأُولِي الْأَمْرِ مِنْكُمْ
فَإِنْ تَنَزَعْتُمْ فِي شَيْءٍ فَرُدُّوهُ إِلَى اللَّهِ وَالرَّسُولِ إِنْ كُنْتُمْ تُؤْمِنُونَ بِاللَّهِ
وَالْيَوْمِ الْآخِرِ ذَلِكَ خَيْرٌ وَأَحْسَنُ تَأْوِيلًا ﴿٥٩﴾

Maksudnya: Wahai orang-orang yang beriman, taatilah Allah dan taatilah Rasul (Nabi Muhammad) serta ululamri (pemegang kekuasaan) di antara kamu. Jika kamu berbeza pendapat tentang sesuatu, kembalikanlah kepada Allah

(al-Quran) dan Rasul (sunnahnya) jika kamu beriman kepada Allah dan hari Akhir. Yang demikian itu lebih baik (bagimu) dan lebih bagus akibatnya (di dunia dan di akhirat).

Hadith Rasulullah SAW

Bersih seperti Bayi yang Baharu Dilahirkan

Orang yang mengerjakan haji dan umrah tanpa cacat cela melakukan dosa dan melanggar perintah Allah SWT serta mengikut segala syarat, rukun, wajib dan adab haji, akan bersih daripada segala dosanya sama seperti bayi yang baru dilahirkan.

Sabda Rasulullah SAW:

مَنْ حَجَّ هَذَا الْبَيْتَ فَلَمْ يَرْفُثْ وَلَمْ يَفْسُقْ رَجَعَ كَيَوْمَ وَلَدَتْهُ أُمُّهُ

Maksudnya: Sesiapa mengerjakan haji ke Baitullah dan tidak melakukan rafath (رَفَثَ) (iaitu larangan bercampur dengan isteri termasuk juga segala yang menimbulkan nafsu berahi, sama ada dengan perbuatan atau perkataan) dan fusuq (فُسُوقٌ) (iaitu larangan maksiat, termasuk segala yang dilarang dalam masa mengerjakan haji seperti berburu dan lain-lain) jadilah keadaan dirinya bersih seperti baru dilahirkan oleh ibunya.

(Riwayat al-Bukhari, 1820; Muslim, 1350)

Syeikh Mutawalli al-Sya'rawi menyatakan bahawa suruhan taat kepada pemerintah disertakan dengan ketaatan kepada Allah SWT dan juga ketaatan kepada Rasulullah SAW. Hal ini menunjukkan bahawa ketaatan kepada pemerintah perlulah pemerintah itu didasari dengan ketaatan kepada Allah SWT dan Rasulullah SAW supaya dengan itu masyarakat akan terpelihara dengan keimanan dan daripada penindasan terhadap rakyat di bawahnya.

Justeru itu, setiap pemerintah itu dituntut untuk menunaikan amanah dengan sempurna dan setiap pemerintah itu juga dituntut agar mereka sentiasa mentaati Allah SWT dan Rasul-Nya. Sekiranya ini tidak berlaku, maka mereka itu akan digelar sebagai pemerintah yang zalim. (Lihat: Tafsir al-Sya'rawi, 2360/4)

Daripada Abi Bakrah RA, bahawa aku mendengar Rasulullah SAW bersabda:

السُّلْطَانُ ظِلُّ اللَّهِ فِي الْأَرْضِ، فَمَنْ أَكْرَمَهُ أَكْرَمَهُ اللَّهُ، وَمَنْ
أَهَانَهُ أَهَانَهُ اللَّهُ

Maksudnya: *Sultan (pemerintah) merupakan bayangan Allah di bumi. Barangsiapa yang memuliakannya maka Allah memuliakannya dan barangsiapa yang menghinaanya maka Allah akan menghinaanya.* [Riwayat al-Baihaqi di dalam Syu'ab al-Iman (6988)] (Hadith ini dinilai sahih oleh Imam al-Suyuthi di dalam al-Jami' al-Saghir, 496/1)

Rasulullah SAW bersabda, “Patuh dan taat itu (pada pemimpin) adalah wajib bagi seseorang dalam hal apa yang ia suka atau benci, selama tidak diperintah berbuat maksiat. Jika diperintah maksiat, maka tidak wajib patuh dan taat.”

(Hadith Riwayat Bukhari)

Perspektif Undang-undang Kerajaan Arab Saudi

Dalam situasi ini, sebagai umat Islam amat penting untuk kita bersikap *tabayyun* iaitu mendapatkan penjelasan dan bersangka baik terhadap segala tindakan yang diambil oleh pihak pemerintah Arab Saudi. Kedudukan undang-undang dan peraturan yang telah ditetapkan oleh pemimpin dan pemerintah kerajaan Arab Saudi iaitu hanya jemaah umrah dan haji sahaja yang boleh berada di dataran Kaabah bagi mengelakkan kesesakan dan penularan penyakit COVID-19 serta influenza bukanlah satu keputusan yang mudah melainkan sudah tentu didatangkan dengan alasan dan justifikasi yang benar-benar kukuh.

Dalam menetapkan sesuatu keputusan, pemerintah Arab Saudi sentiasa akan mengambil kira kemaslahatan umum rakyatnya.

Kaedah menyebut:

تَصَرُّفُ الْإِمَامِ عَلَى الرَّعِيَّةِ مُنَوِّطٌ بِالْمَصْلَحَةِ

Maksudnya: *Polisi pemerintah terhadap rakyatnya hendaklah berasaskan kepada maslahat.*

المصلحة العامة تُقدَّم على المصلحة الخاصة

Maksudnya: *Maslahat umum hendaklah didahulukan daripada masalah khas.*

Para ulama' menetapkan bahawa segala tindakan yang ditetapkan oleh pihak pemerintah wajib didasari dengan maslahat dan kebaikan terhadap masyarakat umum seluruhnya; iaitu rakyat yang berada di bawah tadbir urusannya. Sekiranya tindakan tersebut bertentangan dengan tujuan dan objektif yang asal, maka tindakan tersebut dianggap tidak sah dan tidak terpakai dari sudut syarak. (Mausu'ah al-Qawa'id al-Fiqhiyyah, 2/308)

Melihat kepada kaedah yang kritikal ini, tindakan drastik yang diambil pihak kerajaan Arab Saudi bagi menyekat jemaah yang tidak menunaikan ibadat umrah dan haji beribadat di dataran Kaabah adalah berdasarkan kepada maslahat dan kepentingan umum agar dapat mengurangkan risiko penyebaran wabak COVID-19 dan influenza daripada bertambah lebih teruk.

Perspektif Qawaid al-Fiqhiah dan Maqasid Syariah

Dalam isu melarang jemaah yang menipu dan tidak melakukan ibadat umrah dan haji beribadat dan di dataran Kaabah melainkan hanya di dalam Masjidil Haram dan sekitarnya sahaja seterusnya hanya membenarkan jemaah yang melakukan ibadat umrah dan haji sahaja beribadat di dataran Kaabah. Terdapat beberapa kaedah yang disebutkan oleh fuqaha' dalam berinteraksi dengan perkara yang boleh membawa kepada kemudharatan. Antaranya seperti berikut:

Pertama: Antara hadith yang menjadi kaedah fiqh masyhur ialah:

لا ضرر ولا ضرار

Maksudnya: *Janganlah memudaratkan diri sendiri dan memberi kemudharatan kepada orang lain.*

Riwayat Ibn Majah (2341) dan al-Daraqutni (4/228)

Kedua: Apabila berlaku kemudharatan, maka wajib dihilangkan kemudharatan tersebut. Ini berdasarkan kaedah:

الضرر يزال

Maksudnya: *Kemudharatan hendaklah dihilangkan.*

(al-Wajiz fi Idhah Qawaid al-Fiqh al-Kulliyyah, 258)

Ketiga: Kemudharatan dihindari daripada berlaku dengan semampu mungkin. Ini berdasarkan kaedah fiqh:

الضرر يدفع بقدر الإمكان

Maksudnya: *Kemudharatan itu hendaklah dihindari semampu mungkin.*

(al-Wajiz fi Idhah Qawa'id al-Fiqh al-Kulliyyah, 258)

Syeikh al-Zarqa berkata: Mudarat hendaklah ditolak dengan semampu yang boleh. Jika boleh ditolak keseluruhannya, maka lakukanlah. Sebaliknya, jika tidak mungkin, maka hendaklah mengikut kadar kemampuan. (Syarh al-Qawa'id al-Fiqhiyyah, 207)

Dalam menangani penularan wabak COVID-19 dan influenza yang boleh tersebar melalui tempat yang sesak, kebenaran hanya kepada jemaah yang menunaikan umrah dan haji sahaja yang boleh beribadat di dataran Kaabah adalah bertepatan dengan kaedah-kaedah di atas bagi membendung wabak tersebut daripada tersebar semula atau berkembang semula, sama ada dalam kalangan jemaah haji dan umrah tempatan mahupun dari seluruh negara lain. Kaedah tersebut sebagaimana kaedah yang dinyatakan dalam hadith Rasulullah SAW yang masyhur:

إذا سمعتم بالطاعون بأرض فلا تدخلوها، وإذا وقع بأرض
وأنتم بها فلا تخرجوا منها

Maksudnya: *Jika kamu mendengar penyakit taun melanda di suatu kawasan, janganlah kamu masuk ke kawasan tersebut. Dan jika kamu berada di kawasan tersebut, maka janganlah kamu keluar dari situ.*

Riwayat al-Bukhari (5728), Muslim (2218) dan Ahmad (21860)

Hadith ini menunjukkan pemerintah boleh mengambil tindakan kuarantin atau sebarang sekatan agar penyakit atau wabak tidak tersebar. ‘Abd al-Rahman bin ‘Auf R.A pernah menyebutkan hadith ini kepada Khalifah ‘Umar bin al-Khattab ketika beliau bercadang pergi ke Syam semasa wabak taun sedang merebak di sana. Mendengar hadith ini, Amirul Mukminin ‘Umar al-Khattab membatalkan hasratnya. (**al-Bidayah wa al-Nihayah**, 3/5)

Keempat: Kaedah *fiqh al-Aulawiyyat*:

درء مفاسد مقدم على الجلب المصالح

Maksudnya: *Menolak kemudaratan itu hendaklah didahulukan daripada mendapatkan maslahat.*

(Al-Asyhbah wa al-Nazair, 87)

Apabila berlaku pertembungan antara memperoleh kebaikan dan menolak kemudaratan, maka perlu diutamakan menolak kemudaratan. Dalam isu takut kepada penularan semula wabak COVID-19 dan influenza pada musim haji dan umrah tahun ini, maka perlu didahulukan menolak kemudaratan iaitu dengan melarang jemaah yang tidak melakukan ibadat umrah dan haji beribadat di dataran Kaabah melainkan hanya di dalam Masjidil Haram dan sekitarnya sahaja seterusnya hanya membenarkan jemaah yang melakukan ibadat umrah dan haji sahaja beribadat di dataran Kaabah. Hal ini disebabkan kemudaratan yang ada bersifat pasti atau sangkaan kuat iaitu boleh menggugat nyawa dan kesihatan jemaah lain. Dalam masa yang sama, ibadat selain daripada *Tawaf Wada'* dan *Tawaf Sunat* boleh dilakukan di dalam Masjidil Haram tanpa perlu pergi ke dataran Kaabah.

Kelima: Memelihara *Maqasid Syariah* menjaga nyawa. (الضرورات الخمسة)

Al-Daruriyyat al-Khamsah dalam Maqasid Syariah iaitu keperluan yang manusia bergantung kepadanya sama ada dari sudut kehidupan beragama atau keduniaan. Jika ia tidak ada, maka akan berlaku kekurangan dan ketidaksempurnaan hidup manusia di dunia dan azab seksa di akhirat. Al-Daruriyyat yang asasi ini merangkumi lima perkara iaitu agama, nyawa, akal, keturunan dan harta benda. Ia melibatkan kelangsungan hidup manusia. Menjaga nyawa merupakan prinsip yang kedua terpenting mengikut urutan keutamaan untuk dijaga selepas memelihara agama. (al-Mustasfa Min ‘Ilm al-Usul, 217)

Dalam isu melarang jemaah yang tidak melakukan ibadat umrah dan haji beribadat di dataran Kaabah melainkan hanya di dalam Masjidil Haram dan sekitarnya sahaja seterusnya hanya membenarkan jemaah yang melakukan ibadat umrah dan haji sahaja beribadat di dataran Kaabah. Ia dilakukan bagi menyelamatkan jemaah daripada risiko terkena atau berjangkit penyakit COVID-19 yang boleh menyebabkan kematian atau masalah kesihatan yang berat seperti paru-paru dan jantung. Ia sesekali tidak membelakangkan prinsip pertama iaitu memelihara agama. Ini kerana, pelaksanaan ibadah haji dan umrah hanya diwajibkan dalam keadaan memiliki *istitha'ah* atau kemampuan. Dalam keadaan seseorang tidak mampu melindungi keselamatan dirinya atau menghindarkan dirinya daripada penyakit tersebut, maka ia tidak lagi termasuk dalam kategori golongan yang berkemampuan.

Keputusan Muzakarah Haji Kebangsaan 2022

Kebenaran memasuki dataran Mataf Masjidil Haram bagi jemaah haji. Kawasan dataran Mataf Masjidil Haram adalah hanya bagi mereka yang hendak melakukan tawaf umrah atau (Lil Mukhtamirin) atau tawaf haji. Jemaah haji Malaysia yang tidak berihram haji atau umrah adalah dinasihatkan tidak memasuki dataran Mataf tersebut untuk tujuan *tawaf sunat*, solat atau ibadat yang lain kerana perbuatan tersebut adalah:

- i. Tidak mematuhi peraturan yang ditetapkan oleh pihak berkuasa Arab Saudi.
- ii. Tidak bertepatan dengan adab dan akhlak Mahmudah.
- iii. Menambah kesesakan dataran Mataf Kaabah.

Bagi jemaah haji yang berhasrat untuk *tawaf sunat* apabila memasuki Masjidil Haram tetapi tidak mampu untuk melakukannya di tingkat atas, maka dinasihatkan melakukan solat Tahiyatul Masjid.

Dapatan Data daripada Tinjauan dan Temu Ramah dengan Polis, Tentera dan Penjaga Pintu Masjidil Haram

Hasil daripada tinjauan dan kajian serta penyelidikan yang dijalankan tiga kali bertugas haji dan lima kali bertugas umrah selepas kerajaan Arab Saudi kembali membuka pintu sempadannya untuk jemaah haji dunia kembali melaksanakan Ibadat haji dan umrah selepas ketiadaan musim haji dan umrah hampir dua tahun dari tahun 2020 hingga 2021.

Hasil dapatan yang diperolehi daripada tiga kali bertugas musim haji pada musim haji 2022 (Jun – Ogos 2022), musim haji 2023 (Jun – Ogos 2023) dan musim haji 2024 (Jun – Ogos 2024) serta lima kali dalam bertugas umrah iaitu pada awal September 2022, Disember 2022, Mac 2023, November 2023 dan Mac 2024 maka satu temu ramah berjaya diadakan. Walaupun pada awalnya pihak berkuasa Masjidil Haram menolak untuk mengadakan temu ramah kerana ia dianggap maklumat sulit. Namun begitu, berkat izin Allah SWT, selepas penulis dengan rendah diri benar-benar bersujud dan memohon pertolongan Allah SWT agar dilembutkan hati para pegawai pihak berkuasa Masjidil Haram. Akhirnya, beberapa anggota pihak berkuasa setuju untuk membantu memberi maklumat dalam melengkapkan penyelidikan ini tetapi dengan syarat gambar mereka tidak boleh diambil dan nama mereka tidak boleh dipaparkan kecuali nama pendek sahaja.

Apabila ditanya mengapa mereka membenarkan jemaah yang menyamar pakai ihram masuk ke laluan dataran Mataf Kaabah sedangkan jelas mereka menyamar memakai ihram kerana di antara mereka nampak jelas di sebalik ihram ada bayang-bayang memakai seluar, ada memakai t-shirt di dalam ihram dan juga memakai sepatu bertutup penuh. Adakah pihak berkuasa Arab Saudi membenarkan perkara tersebut iaitu perbuatan menyamar? Soalan ini sangat penting kerana di depan pintu laluan pemeriksaan jelas terpapar perkataan “Muhrim only” (محرم فقط) iaitu hanya dibenarkan jemaah yang memakai ihram sahaja yang dibenarkan masuk. Kita bimbang jemaah akan keliru apakah maksud “Muhrim Only”. Adakah ia bermaksud, asalkan orang yang pakai ihram walaupun menyamar tetap boleh masuk ke dataran Mataf Kaabah.

Salah seorang daripada mereka yang mesra disapa Leftenan Salman telah menjawab dengan sempurna daripada persoalan yang diajukan seperti berikut;

- i. Perkataan “Muhrim Only” yang dilekatkan di pintu masuk ke dataran Mataf Kaabah adalah bermaksud jemaah yang berihram umrah atau haji. Dan ia bukanlah bermaksud dibenarkan seseorang yang tidak melakukan umrah dan haji menyamar memakai ihram dan dibenarkan masuk ke dataran mataf Kaabah.
- ii. Perkataan “Muhrim Only” seperti mana termaktub dalam kitab Fiqh, iaitu bermaksud orang yang berihram melaksanakan ibadat haji dan umrah sahaja. Katanya, “Mana ada orang pakai ihram pergi pejabat, bawa teksis atau pergi berenang”.

- iii. Pihak berkuasa Masjidil Haram tahu ramai jemaah dunia termasuk dari negara Malaysia yang menyamar memakai ihram masuk ke dataran Mataf Kaabah semata-mata ingin duduk beribadat di depan Kaabah. Mereka tidak mampu menahan kesemuanya kerana jumlah jemaah dunia yang ramai sedangkan mereka hanya ada 4 – 5 anggota di setiap pintu. Oleh itu, mereka tidak mampu menahannya serta melepaskan mereka dengan niat mereka betul-betul dalam ihram. Namun begitu, pihak berkuasa Masjidil Haram memaklumkan, jika jemaah dunia menipu termasuk jemaah dari Malaysia, maka itu “هذا بينك وبين الله” bermaksud “Itu perhitungan antara kamu dengan Allah SWT”. Allahu Akbar.

4. KESIMPULAN

Justeru, dapat disimpulkan, seperti mana disebut di atas dalam Muzakarah Haji Kebangsaan 2022, Lembaga Tabung Haji menyatakan, dalam menjaga adab Mahmudah, maka jemaah haji dinasihatkan tidak melakukan *Tawaf Wada'* dan ibadat sunat yang lain di dataran Mataf Kaabah bagi mentaati keputusan kerajaan Arab Saudi di samping mengelakkan Masyaqqah di dataran Mataf Kaabah serta mengekang wabak penyakit COVID-19 daripada kembali menular.

Melakukan satu ibadat yang baik seperti melaksanakan ibadat haji dan umrah tetapi dalam masa yang sama melakukan dosa yang sengaja dengan menipu menyamar memakai ihram walaupun pada hakikatnya tidak melaksanakan ibadat umrah dan haji tetapi sebaliknya mahu bersenang-senang beribadat di depan kaabah di dataran Mataf adalah berdosa dan dibimbangi akan mengganggu kemabruran haji dan umrahnya. Sesungguhnya dalam Islam, matlamat tidak menghalalkan cara.

Bagi jemaah yang sakit atau uzur tetapi mahu melakukan ibadat *Tawaf Sunat* atau *Tawaf Wada'*, maka dinasihatkan tidak melakukan penipuan. Ini kerana pihak berkuasa Arab Saudi telah menyediakan perkhidmatan *kereta buggy* berbayar yang mengambil masa hanya lebih kurang 10 hingga 15 minit sahaja sambil dipandu oleh pekerja Masjidil Haram sendiri dengan kadar bayaran 50 Riyal untuk sekali Tawaf tujuh pusingan. Di samping itu juga, perkhidmatan upah kerusi roda ditolak oleh pekerja Masjidil Haram untuk perkhidmatan

tawaf masih dikekalkan dalam Masjidil Haram. Bagi yang tidak mampu dengan kewangan, maka bolehlah minta bantuan keluarga atau rakan sebilik meminjam kereta sorong yang disediakan oleh pihak hotel, *travel* atau waqaf disediakan untuk menolaknya di Masjidil Haram. Semoga dengan keikhlasan dan kejujuran kita dalam beribadat dilihat dan dipandang Allah SWT dan seterusnya dikurniakan haji dan umrah yang mabrur. Amin Ya Allah.

5. PENGHARGAAN

Ucapan terima kasih dan sekalung penghargaan buat **Andalusia Travel & Tours** di atas geran penyelidikan yang diberikan untuk menjalankan penyelidikan di Tanah Suci Mekah yang bertajuk “Kajian Haji dan Umrah di Musim Pandemik dan Endemik COVID-19: Pengurusan Serta Hukum-Hakam: Satu Kajian Perundangan”, musim haji 2022 – 2025. Terima kasih juga buat **Universiti Sains Islam Malaysia (USIM)** yang menyokong penuh sepanjang penyelidikan ini dijalankan, bermula dengan pendaftaran penyelidikan di peringkat universiti sehinggalah ia berjaya disiapkan dengan sempurna. Akhir sekali, ucapan syabas dan terima kasih juga khas buat **Jabatan Waqaf, Zakat dan Haji (JAWHAR)** kerana telah memainkan peranan utama dalam memastikan umat Islam di Malaysia mendapat rujukan haji dan umrah terkini dengan menerima hasil penyelidikan ini yang mana lahirnya artikel jurnal ini seterusnya menerbitkannya untuk rujukan dan bacaan para pemain dalam industri haji dan umrah serta para tetamu Allah SWT dalam mengejar haji dan umrah mabrur.

6. RUJUKAN

Al-Quran Al-Karim

- Al-Bakri, Zulkifli. (2011). *Kitab Taudih Syarah al-Idoh Manasik al-Hajj wal-Umrah*. Cetakan ke-2. Bangi. Darul Syakir.
- Al-Bukhari, Muhammad Ismail Abu Abdullah. (1987). *Sahih Al-Bukhari*. Cetakan ke-2. Bierut. Dar Ibnu Kathir.
- Al-Burnu, Muhammad Sidki Ahmad. (1997). *Mausu'ah al-Qawa'id al-Fiqhiyyah*. Riyadh. Maktabah at-Taubah.
- Al-Burnu, Muhammad Sidki Ahmad. (1996). *al-Wajiz fi Idhah Qawaid al-Fiqh al-Kulliyyah*. Beirut. Muassasatu ar-Risalah.
- Al-Fatani. Abdul Faqir al-Fatani Muhammad bin Ismail Daud Fatani. *Matla Al-Badrain*
- Al-Khin. Mustafa, al-Bugha, Mustafa, al-Syarbaji, Ali. (2004). *Fiqh Al-Manhaji Ala Mazhab Imam As-Syafi'i*. Cetakan pertama. Jabatan Mufti Kerajaan Negeri. Negeri Sembilan.
- Al-Makki, Abdul Fatah Hussain. (1995). *Kitab I'doh Fi Manasik Al-Hajj Wal-Umrah*. Cetakan ke-3. Makkah. Maktabah Al-Imdadiah.
- Al-Munziri, Abdul Azim. (1968). *Al-Targhib Wa At-Tarhib*. Cetakan ke-3. Mesir. Dar Ihya al-Turath Al-Arabi
- Al-Nadwi, Ali Ahmad. (2000). *Al-Qawaid Al-Fiqhiyah*. Cetakan ke-5. Damsyik. Dar Qalam.
- Al-Nawawi, Muhyi al-Din Yahya bin Sharaf. *al-Majmu' Syarh al-Muhazzab*, Beirut. Lubnan. Dar Kutub al-Ilmiah.
- Assubki, Imam Tajuddin Taqiyuddin. (1411 – 1441 M). *Al-Asyhbah wa al-Nazair*. Beirut. Lubnan. Dar Kutub al-Ilmiah.
- Al-Qusyairi. Muslim Al-Hujjaj Abu Hussain. *Sahih Al-Muslim*. Bierut. Dar Ihya AlTuras.
- Al-Zuhaili, Wahbah. (1999). *Fiqh dan Perundangan Islam*. Dewan Bahasa Dan Pustaka. J.3. C.3.
- Lembaga Tabung Haji Malaysia. (2008). *Ibadat Haji, Umrah dan Ziarah*. Cetakan ke-2. Percetakan Warni Sdn. Bhd.
- Zaidan, Abdul Karim. (1993). *Al-Wajiz Fi-Usul Al-Fiqh*. Cetakan pertama. Kaherah. Dar Tauzik Wa Nashru Al-Islamiah.
- Zarqa, Ahmad. (1983). *Syarh al-Qawa'id al-Fiqhiyyah*. Beirut. Dar Gharb al-Islami.